

Монгол Улсын Их Хурлын Хууль зүйн
байнгын хорооны 2026 оны 04 дүгээр
сарын 29-ний өдрийн 04 дүгээр
тогтоолын 9 дүгээр хавсралт

**МОНГОЛ УЛСЫН ИХ ХУРЛЫН ХУУЛЬ ЗҮЙН БАЙНГЫН ХОРООНД
САНАЛ БОЛГОСОН ШҮҮХИЙН ЕРӨНХИЙ ЗӨВЛӨЛИЙН ШҮҮГЧ БУС
ГИШҮҮНД НЭР ДЭВШИГЧИЙН ТАЛААРХ АЖЛЫН ХЭСГИЙН ТАЙЛАН**

Товч удирдамж: Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгаруулах журам /цаашид “журам” гэх/-ын 12.1, 12.2, 12.3, 12.4, 12.6-д заасны дагуу Ажлын хэсэг нь олонхын саналаараа Монгол Улсын Их Хурлын Хууль зүйн байнгын хороонд санал болгосон нэр дэвшигчийн талаарх тайланг энэхүү загварт нийцүүлэн бичих үүрэгтэй.

1	Эцэг/эхийн нэр: Батчулуун Ургийн овог: Хаа Гүн Нэр: Амартүвшин Хүйс: Эрэгтэй Төрсөн он: 1978. [REDACTED] Төрсөн газар: Улаанбаатар хот, Сүхбаатар дүүрэг, 1-р төрөх эмнэлэг Одоо оршин суугаа аймаг/нийслэл, сум/дүүрэг: Улаанбаатар хот, [REDACTED]
Сонгон шалгаруулалт, түүний үе шат, явуулсан ажиллагааны танилцуулга Сонгон шалгаруулалтын есөн үе шат тус бүрийг журмын Дөрөв, Тав, Зургаа, Долоо, Найм, Ес, Арав, Арван нэг, Арван хоёр, Арван гуравт заасны дагуу хэрхэн хэрэгжүүлсэн талаар тодорхой, ойлгомжтой бичнэ.	
2	Нэгдүгээр үе шат <i>Монгол Улсын шүүхийн тухай хууль /Шинэчилсэн найруулга/-иар Шүүхийн ерөнхий зөвлөлийн шүүгч бус гишүүн болон Шүүхийн сахилгын хорооны шүүгч бус гишүүнийг Монгол Улсын Их Хурлаас нээлттэйгээр нэр дэвшүүлж, сонгон шалгаруулж томилохоор заасны дагуу 2026 оны 05 дугаар сарын 07-ны өдрөөс 05 дугаар сарын 27-ны өдрийн 17 цаг 30 минут хүртэл нэр дэвших тухай хүсэлт, баримт бичгийг хүлээн авах тухай зарыг Монгол Улсын Их Хурлын цахим хуудас, Монгол үндэсний олон нийтийн радио телевиз, хэвлэл мэдээллийн сайт болон өдөр тутмын хоёроос доошгүй өдрийн сонинд нийтлүүлж нийтэд мэдээлсэн.</i>
3	Хоёрдугаар үе шат <i>Хууль зүйн байнгын хорооны 2026 оны 05 дугаар сарын 05-ны өдрийн 05 дугаар тогтоолоор сонгон шалгаруулалтын бүртгэлийн хугацааг тогтоож, хүсэлт, баримт бичгийг 21 хоногийн хугацаанд хүлээн авахаар нийтэд мэдээлсэн бөгөөд Шүүхийн ерөнхий зөвлөлийн шүүгч бус гишүүнд нэр дэвшигч Б.Амартүвшин нь хүсэлт, холбогдох баримт бичгээ хугацаанд нь буюу 2026 оны 05 дугаар сарын 25-ны өдөр ирүүлснийг Байнгын хорооны ажлын алба хүлээн авсан.</i>
4	Гуравдугаар үе шат <i>Монгол Улсын шүүхийн тухай хууль /Шинэчилсэн найруулга/-ийн 77 дугаар зүйлийн 77.2-т “Ажлын хэсэг нь Улсын Их Хурал дахь олонх, цөөнх, Ерөнхийлөгч, Засгийн газар, Хүний эрхийн Үндэсний Комисс, Монголын Хуульчдын холбоо, Монголын Өмгөөлөгчдийн холбоо, хууль зүйн сургалт, судалгааны байгууллага, хууль зүйн их, дээд сургуулийн санал болгосон төлөөллөөс бүрдсэн 11 гишүүний бүрэлдэхүүнтэй байх бөгөөд ажлын хэсгийг Улсын Их Хурлын даргын захирамжаар томилсон Улсын Их Хурлын гишүүн ахална.” гэж заасан.</i> <i>Дээрх заалтын дагуу Хууль зүйн байнгын хорооны 2026 оны 05 дугаар сарын 19-ний өдрийн 07 дугаар тогтоолоор Шүүхийн ерөнхий зөвлөлийн шүүгч бус гишүүнийг сонгон шалгаруулах үүрэг бүхий ажлын хэсгийг Улсын Их Хурлын</i>

	гишүүн Д.Ганбат ахалж, гишүүдэд Улсын Их Хурал дахь Монгол Ардын намын бүлгийн Ажлын албаны дарга Ч.Сарангэрэл, Улсын Их Хурал дахь Ардчилсан намын бүлгийн зөвлөх Д.Батмөнх, Хүний эрхийн Үндэсний Комиссын дарга Д.Сүнжид, Засгийн газрын Хэрэг эрхлэх газрын Хууль, эрх зүйн газрын дарга Я.Жавхлан, Монгол Улсын Ерөнхийлөгчийн Тамгын газрын Хуулийн бодлогын газрын дарга Ж.Мөнхболд, Монголын Өмгөөлөгчдийн холбооны гишүүн З.Сүхбаатар, Монголын Хуульчдын холбооны Зөвлөлийн гишүүн Б.Баасандорж, Монгол Улсын Их Сургуулийн Хууль зүйн сургуулийн захирал, профессор Б.Амарсанаа, “Шихихутуг” их сургуулийн Судалгааны хүрээлэнгийн захирал, доктор, профессор Б.Нармандах, Үндсэн хуулийн эрх зүйн хүрээлэнгийн багш С.Сүхчулуун нарын бүрэлдэхүүнтэй байгуулсан.
5	Дөрөвдүгээр үе шат Ажлын хэсэг 2026 оны 05 дугаар сарын 27-ны өдөр хуралдаж Монгол Улсын шүүхийн тухай /Шинэчилсэн найруулга/ хууль болон Хууль зүйн байнгын хорооны 2026 оны 04 дүгээр сарын 29-ний өдрийн 04 дүгээр тогтоолоор баталсан “Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгаруулах журам”-д заасан баримт бичгийн шаардлагыг хангасан гэж үзэн Шүүхийн ерөнхий зөвлөлийн шүүгч бус гишүүнд 12 иргэнийг нэр дэвшигчээр бүртгэсэн бөгөөд 2 иргэнийг хуульд заасан “эрх зүйчээр 10-аас доошгүй жил ажилсан байх” гэсэн шаардлага нотлогдоогүй гэж үзэн бүртгэхээс татгалзсан болно. Ажлын хэсгийн энэхүү хуралдаанаар хүсэлт, баримт бичгээ ирүүлсэн Б.Амартүвшинг Шүүхийн ерөнхий зөвлөлийн шүүгч бус гишүүний сонгон шалгаруулалтад нэр дэвшигчээр бүртгэсэн.
6	Тавдугаар үе шат “Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгаруулах журам”-ын 9.1-д “нэр дэвшигчээр бүртгэснээс хойш ажлын нэг өдрийн дотор нэр дэвшигчдийн нэрс, нэр дэвших тухай хүсэлт, холбогдох бусад мэдээллийг Улсын Их Хурлын цахим хуудаст байршуулж, нийтэд түгээнэ.” гэж заасны дагуу дээр дурдсан 12 нэр дэвшигчийн баримт бичгийг www.parliament.mn Улсын Их Хурлын цахим хуудаст байршуулсан. Б.Амартүвшингийн нэр дэвших тухай хүсэлт, холбогдох бусад мэдээллийг Улсын Их Хурлын цахим хуудаст 2026 оны 06 дугаар сарын 02-ны өдрөөс эхлэн нээлттэй байршуулсан.
7	Зургадугаар үе шат Хууль зүйн байнгын хорооны 2026 оны 04 дүгээр тогтоолоор баталсан “Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгаруулах журам”-ын 10.1-д “Энэ журмын 9.1-д заасны дагуу бүртгэсэн шийдвэр гармагц Ажлын хэсэг нэр дэвшигчийг Ажлын хэсгийн ахлагчаас бусад гишүүн бүрд тохиолдлын журмаар тэнцвэртэй хуваарилж илтгэгч гишүүнийг томилно” гэж заасныг баримтлан 2026 оны 06 дугаар сарын 02-ны өдрийн Ажлын хэсгийн хуралдаанаар нэр дэвшигч тус бүрийн илтгэгч гишүүнийг сугалаагаар тодруулж, илтгэгч гишүүнийг томилсон. Нэр дэвшигч Б.Амартүвшингийн илтгэгч гишүүнээр Ажлын хэсгийн гишүүн Б.Нармандах, С.Сүхчулуун нар сонгогдсон бөгөөд илтгэгч гишүүн Журмын 10.4-т заасан ажиллагааг явуулж холбогдох мэдээллийг цуглуулсан.
8	Долдугаар үе шат Хууль зүйн байнгын хорооны 2026 оны 04 дүгээр тогтоолоор баталсан “Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгаруулах журам”-ын 11.1-д “Энэ журмын 10.10-д заасан хугацаа дууссанаас хойш ажлын таван өдрийн дотор нэр дэвшигчийн талаар бүрдүүлсэн мэдээллийг нягтлах, тодруулах зорилгоор Ажлын хэсэг хэлэлцүүлэг зохион байгуулна.” гэж, 11.2-д “Ажлын хэсэг зургаагаас доошгүй тооны гишүүний

	<i>ирцтэйгээр хэлэлцүүлгийг хийх бөгөөд Ажлын хэсгийн ахлагч даргална.” гэж заасан.</i> <i>Ажлын хэсгийн гишүүд 2026 оны 06 дугаар сарын 25-ны өдөр Төрийн ордны “Үндсэн хууль танхимд” нэр дэвшигч Б.Амартүвшинтэй ажлын хэсгийн хэлэлцүүлгийг зохион байгуулсан.</i>
9	Наймдугаар үе шат <i>“Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгаруулах журам”-ын 12.1-д “Энэ журмын 11.6-д заасан хугацаа дууссанаас хойш ажлын дөрвөн өдрийн дотор Ажлын хэсэг дараах журмаар хуралдаж Ерөнхий зөвлөлийн эсхүл Сахилгын хорооны шүүгч бус гишүүнд нэр дэвшүүлэх эсэхийг шийдвэрлэнэ.” гэж, мөн журмын 13.2-т “Ажлын хэсэг энэ журмын 13.1-д заасан нэр дэвшигчийн нэр, тэдгээрийн талаарх Ажлын хэсгийн тайлан, холбогдох баримт бичгийг Байнгын хороонд хүргүүлнэ.” гэж заасны дагуу саналаа Хууль зүйн байнгын хороонд хүргүүлэх зохицуулалттай.</i> <i>Ажлын хэсэг Монгол Улсын шүүхийн тухай хуулийн 77 дугаар зүйлийн 77.4.5-т “Энэ хуулийн 77.4.4-т заасан санал хураалтын дүнгээр Ажлын хэсгийн гишүүдийн олонхын санал авсан нэр дэвшигчийг саналын дарааллаар эрэмбэлэн сул орон тоогоор болон дараагийн олонхын санал авсан хоёр хүртэл хүний хамт нэр дэвшүүлж, Байнгын хороонд тайлангийн хамт ажлын гурван өдрийн дотор хүргүүлэх.” гэж заасан. Ажлын хэсэг 2026 оны 07 дугаар сарын 02-ны өдөр хуралдаж, илтгэгч гишүүн бүр өөрсдийн судалсан нэр дэвшигчийн талаарх дэлгэрэнгүй тайланг танилцуулж, ажлын хэсгийн бусад гишүүн саналаа хэлж, асуулт асууж хэлэлцсэн. Үүний дараагаар санал хураалтыг нууцаар явуулахад нэр дэвшигч Б.Амартүвшинг Ажлын хэсгийн 6 гишүүн дэмжиж, олонхын санал авсан тул Шүүхийн ерөнхий зөвлөлийн шүүгч бус гишүүнд нэрийг нь дэвшүүлэхээр шийдвэрлэсэн.</i>
10	Есдүгээр үе шат <i>Ажлын хэсэг Монгол Улсын шүүхийн тухай хуульд заасны дагуу нэр дэвшигч Б.Амартүвшинг Хууль зүйн байнгын хороонд санал болгохоор тогтож, Ажлын хэсгийн тогтоол баталсан болно.</i>
11	Сонгон шалгаруулалтын үйл явцыг нэгтгэн дүгнэх нь <i>Ажлын хэсэг Монгол Улсын шүүхийн тухай хууль /Шинэчилсэн найруулга/ болон “Шүүхийн ерөнхий зөвлөлийн болон Шүүхийн сахилгын хорооны шүүгч бус гишүүнийг сонгон шалгарууларх” журамд заасны дагуу бүрэн эрхээ хэрэгжүүлж, сонгон шалгаруулалтыг хууль, журамд заасны дагуу зохион байгуулж явуулсан болно.</i>
Шүүхийн ерөнхий зөвлөлийн шүүгч бус гишүүнд тавих шаардлагыг хангасан тухай үнэлгээ Нэр дэвших тухай хүсэлт, түүний хавсралт, нэр дэвшигчийн хэвлүүлсэн бүтээл, олон нийтэд өгсөн мэдээлэл, олон нийтээс ирүүлсэн асуулт, санал, нэр дэвшигчийн талаар бусад хүмүүстэй хийсэн ярилцлага, нэр дэвшигчтэй илтгэгч гишүүний ганцаарчлан хийсэн ярилцлага, Ажлын хэсгийн хэлэлцүүлэг, илтгэгч гишүүний дэлгэрэнгүй тайлан, нэр дэвшигчээс болон бусад этгээдээс гаргуулан авах зэргээр цуглуулсан мэдээлэл, баримт бичиг, нотлох баримтад тулгуурлан нэр дэвшигчид тавих шаардлагыг яагаад хамгийн сайн хангасан гэж үнэлж дүгнэсэн тухайгаа журмын 12.6.3-т заасны дагуу ойлгомжтой, тодорхой бичнэ.	
12	Хууль зүйн өндөр мэргэшилтэй: хууль зүйн өндөр мэдлэг, чадвар, туршлагатай тухай <i>Нэр дэвшигч эрх зүйч мэргэжлээрээ 2000.11.30-наас ХУД-ийн цагдаагийн хэлтэст хэрэг бүртгэгчээр ажиллаж байгаад 2003.10.15-нд хүсэлтээр чөлөөлөгдсөн. 2008.05.01-ны өдрөөс ГХУСА33-ийн АА-нд мэргэжилтэн, 2011.09.16-ны өдрөөс ХЗДХЯаманд Хууль зүйн бодлогын газарт мэргэжилтэн, 2012.10.01-ны өдрөөс УБЕГ-ын хуулийн хэлтсийн дарга, 2012.12.14-ний өдрөөс БЗД-ийн ЗДТГ-ын даргаар ажиллаж байсан. 2021.03.15-ны өдрөөс Эрдэнэс силвер ресурс ХХК-ний Захиргаа, гэрээ эрх зүйн зөвлөх, 2023.05.15-наас Өмгөөллийн</i>

	шинэ эргэлт партнерс ХХК-д өмгөөлөгчөөр ажилласан байна. түүний ажлын энэ туршлага нь хууль хэрэглээний бүхий л түвшний туршлага хуримтлуулсныг харуулж байна. Тухайлбал, Хүн худалдаалахтай тэмцэх тухай хуулийн төсөл боловсруулах ажлын хэсэг; Мөнгө угаах болон терроризмыг санхүүжүүлэхтэй тэмцэх тухай хуулийн шинэчлэл; Эрүүгийн хууль, Эрүүгийн байцаан шийтгэх хуульд нэмэлт өөрчлөлт оруулах төсөл; Сонгуулийн хууль тогтоомжтой холбоотой Засгийн газрын санал, дүгнэлт боловсруулах ажилд оролцож хууль тогтоомж боловсруулах түвшинд ажилласан байна. Энэ түүний хууль зүйн онолын мэдлэгийг бодлогын түвшинд хэрэгжүүлэх чадвартай болохыг харуулна. Баянзүрх дүүргийн Засаг даргын Тамгын газрын даргаар 8 жилийн хугацаанд ажиллаж, хууль тогтоомжийн хэрэгжилтийг хангах, хүний нөөцийн бодлого хэрэгжүүлэх, төсөв удирдах, захиргааны шийдвэр гаргаж, захиргааны эрх зүйн чиглэлээр мэргэшсэн болохыг харуулна. Монголын Өмгөөлөгчдийн холбооны шалгалтад тэнцэж өмгөөлөгчийн эрх авсан бөгөөд шүүхэд төлөөлөл хэрэгжүүлж, хууль зүйн зөвлөгөө өгч байгаа нь практик ур чадвараа баталгаажуулсан үзүүлэлт юм. Мөн НҮБ-ын Хүүхдийн сантай хамтарсан төсөл, Хүн худалдаалахтай тэмцэх чиглэлээр олон улсын туршлага судлах ажил, ФАТФ-ын зөвлөмжийг дотоодын хууль тогтоомжид нэвтрүүлэх ажиллагаанд оролцсон зэрэг нь түүний ажлын дадлага туршлагаас гадна мэргэжлийн өндөр мэргэшсэн байдлыг харуулна гэж үзсэн болно.
13	Хууль зүйн өндөр мэргэшилтэй: мэргэжлийн ёс зүйн өндөр шаардлага хангасан тухай Б.Амартүвшиний эрхэлж байсан ажил албан тушаалууд нь хуульд захирагдан, аливаа улс төр, эдийн засаг, хувийн ашиг сонирхлын нөлөөллөөс ангид шийдвэр гаргах чадварыг шаарддаг бөгөөд энэ талаар арга хэмжээ зөрчил гаргаж байсан талаар нотлох баримт байхгүй байгаа бөгөөд албан тушаалын хувьд дэвшин ажиллаж ирсэн нь түүнийг бусдын нөлөөнд автахгүй, хараат бусаар ажиллах, зарчимч, шударга зан төлөвтэй, мэргэжлийн ёс зүйн өндөр шаардлагыг хангасан нэгэн гэж үнэлэх үндэслэл болно. Мөн журамд заасны дагуу ярилцлага хийсэн хүмүүс болон тодорхойлогчдын тодорхойлолтод түүнийг зарчимч, шударга, асуудлыг шууд шийдвэрлэдэг, шуурхай болохыг онцолж байсныг уламжилъя. Нөгөө талаар нэр дэвшигч Шүүхийн ерөнхий зөвлөлийн шүүгч бус гишүүнээр ажиллах хүсэлт, тайлбартаа шүүхийн бие даасан байдал, шүүгчийн хараат бус байдлыг хамгаалах асуудлыг тэргүүлэх зорилтын нэгээр тодорхойлсон нь түүний хараат бус байдлын талаарх ойлголт, үнэт зүйлийг харуулж байна. Ирүүлсэн материал, ажлын туршлага, хэрэгжүүлсэн ажлын үр дүнгээс үзэхэд Б.Амартүвшин нь хууль дээдлэх, нийтийн ашиг сонирхлыг эрхэмлэх, хүний эрхийг хамгаалах үзэл баримтлалтай, хариуцлагатай, зарчимч хандлагатай хуульч бөгөөд төрийн болон хууль зүйн салбарт удаан хугацаанд ажилласан туршлага нь түүнийг хараат бусаар ажиллах чадвартай, мэргэжлийн ёс зүйн өндөр шаардлагыг хангахуйц түвшинд төлөвшсөн гэж урьдчилан үнэлэх үндэслэл болж байна.
14	Эрх зүйч мэргэжлээр 10-аас доошгүй жил ажилласан тухай Нэр дэвшигч Б.Амартүвшин нь эрх зүйч мэргэжлээр 10-с доошгүй жил ажилласан болохыг түүний ажилласан байдал, нийгмийн даатгалын шимтгэл, ажлын байрны тодорхойлолт зэрэгт үндэслэн тус шаардлагыг хангасан гэж үзсэн. Тодруулбал, 1. Нэр дэвшигч нь 1996-2000 онд МУИС-ийн Хууль зүйн сургуульд эрх зүйч мэргэжлээр суралцаж төгссөн байна. Бакалаврын дипломын дугаар [REDACTED]

2. Нэр дэвшигч нь 2015.06.15-ны өдөр Хууль сахиулахын их сургуульд “Нутгийн захиргааны байгууллагын гэмт хэргээс урьдчилан сэргийлэх ажлын арга зүй, зохион байгуулалт” сэдвээр диплом бичиж, магистрын зэрэг хүртсэн байна. Магистрын дипломын дугаар [REDACTED]
3. Монголын хуульчдын холбоо, 2014.07.07-ны өдөр Б.Амартүвшинг Монголын хуульчдын холбооны гишүүнээр элсүүлсэн тул хуульчийн мэргэжлийн үйл ажиллагаа эрхлэх гэрчилгээ олгожээ. Гэрчилгээний дугаар [REDACTED].
4. Монголын өмгөөлөгчдийн холбоо, 2025.01.13-ны өдөр. Б.Амартүвшинг Монголын өмгөөлөгчдийн холбооны нэгдсэн бүртгэлд бүртгэж, өмгөөллийн үйл ажиллагаа эрхлэх эрхийн гэрчилгээ олгожээ. Гэрчилгээний дугаар [REDACTED].
5. 2025.01.13-ны өдрөөс одоог хүртэл Монголын Өмгөөлөгчдийн холбооны гишүүн, өмгөөлөгч. Өмгөөллийн үйл ажиллагаа эрхлэх эрхийн гэрчилгээ дугаар [REDACTED], огноо 2025.01.13-ны өдөр.
6. 2023.05.05-ны өдрөөс одоог хүртэл Өмгөөллийн “Шинэ эргэлт партнерс” ХХК-д зөвлөх. 2023.05.15-ны өдөр байгуулагдсан хөлсөөр ажиллах гэрээний дагуу нотлогдож байна.
7. 2021.03.15-ны өдрөөс 2022.06.06-ны өдрийг хүртэл “Эрдэнэс силвер ресурс” ХХК-ийн Захиргаа, гэрээ эрх зүйн асуудал хариуцсан зөвлөх. Эрдэнэс силвер ресурс болон Б.Амартүвшин нарын хооронд 2021.03.15-ны өдөр хөлсөөр ажиллах гэрээ байгуулагдсан байна. Мөн гэрээнд хөлсөөр ажиллах гэрээг хугацаанаас өмнө буюу 2022.06.06-ны өдрөөр дуусгавар болгож байгаа талаар тусгагдсан байна.
8. 2012.12.14-ний өдрөөс 2020.11.11-ний өдрийг хүртэл Баянзүрх дүүргийн Засаг даргын Тамгын газрын дарга. Баянзүрх дүүргийн Засаг даргын 2012.12.14-ний өдрийн дугаар Б/40 “Б.Амартүвшингээр ажил, албан тушаал түр орлон гүйцэтгүүлэх тухай” захирамжаар тус дүүргийн Засаг даргын Тамгын газрын даргын албан үүргийг 2012.12.14-ний өдрөөс эхлэн түр орлон гүйцэтгүүлэхээр заажээ. Баянзүрх дүүргийн Засаг даргын 2020.11.11-ний өдрийн “Б.Амартүвшинг төрийн албанаас түр чөлөөлөх тухай” захирамжид заасны дагуу Б.Амартүвшин нь зургаан сараас дээш хугацаагаар суралцах болсонтой холбогдуулан үүрэгт ажлаас чөлөөлөгдөх хүсэлт гаргасан тул 2020.11.11-ний өдрөөр тасалбар болгон үүрэгт ажлаас нь чөлөөлж, төрийн албанаас түр чөлөөлсөн байна.
9. 2012.10.01-ний өдрөөс 2012.12.24-ний өдрийг хүртэл Улсын бүртгэлийн ерөнхий газрын Хуулийн хэлтсийн дарга. Улсын бүртгэлийн ерөнхий газрын даргын 2012.10.01-ний өдрийн “Албан үүргийг түр орлон гүйцэтгүүлэх тухай” тушаалд Б.Амартүвшинг тус газрын Тамгын газрын Хуулийн хэлтсийн даргын албан үүргийг түр орлон гүйцэтгэгчээр томилжээ. Мөн 2012.12.24-ний өдрийн “Ажлаас чөлөөлөх тухай” дугаар 1152 тушаалд өөр ажилд шилжих болсонтой холбогдуулж түүний хүсэлтийг харгалзан Б.Амартүвшинг тус газрын Тамгын газрын Хуулийн хэлтсийн даргын түр орлон гүйцэтгэгч үүрэгт ажлаас нь чөлөөлсөн байна.
10. 2011.09.16-ны өдрөөс 2012.10.01-ний өдрийг хүртэл Хууль зүй, дотоод хэргийн яамны Хууль зүйн бодлогын газрын мэргэжилтэн. Хууль зүй, дотоод хэргийн яамны Төрийн нарийн бичгийн даргын 2011.09.16-ны

	өдрийн “Ажлаас чөлөөлж, ажилд томилох тухай” дугаар 94 тушаалд Б.Амартүвшинг Хууль зүйн бодлогын газарт мэргэжилтнээр томилохоор заажээ. 11. 2008.04.30-ны өдрөөс 2011.09.16-ны өдрийг хүртэл Хууль зүй, дотоод хэргийн яамны харьяа Монгол Улсад Гэмт хэргээс урьдчилан сэргийлэх ажлыг зохицуулах зөвлөлийн Ажлын албаны мэргэжилтэн. Хууль зүй, дотоод хэргийн яамны Төрийн нарийн бичгийн даргын 2008.04.30-ны өдрийн “Ажилд түр томилох тухай” дугаар 60 тушаалд Батчулууны Амартүвшинг Гэмт хэргээс урьдчилан сэргийлэх ажлыг зохицуулах зөвлөлийн ажлын албанд мэргэжилтнээр түр хугацаагаар томилсугай гэжээ. 12. 2007-2008 онд “Бридж групп” ХХК-д хуулийн зөвлөх. НДШ-ийн лавлагаа болон нэр дэвшигчийн талаар мэдээлэл өгөх хүнтэй хийсэн ярилцлагаар нотлогдож байна. 13. 2000.11.30-ны өдрөөс 2003.10.15-ны өдрийг хүртэл Хан-Уул дүүргийн Цагдаагийн хэлтэст хэрэг бүртгэгч. Цагдаагийн ерөнхий газрын төв архивын лавлагаа 2026.05.07-ны өдрийн дугаар 26-08/730 дагуу нотлогдож байна. Дээрхээс үзэхэд нэр дэвшигч нь эрх зүйч мэргэжлээр 10-с доошгүй жил ажилласан байх шаардлагыг хангасан гэж үзсэн болно.
15	Төрийн алба хаах насны дээд хязгаарт хүрээгүй тухай Б.Амартүвшин нь 1978 онд төрсөн, төрсөн сараар тооцвол 47 настай. Төрийн алба хаах насны дээд хязгаарт хүрээгүй.
16	Шүүгчээр ажиллаж байгаагүй тухай Нэр дэвшигчийн ирүүлсэн ТАХ-ийн анкет, НДШ төлөлтийн лавлагаанаас нэр дэвшигч сүүлийн таван жил шүүгчээр ажиллаж байгаагүй.
17	Сүүлийн таван жилд улс төрийн болон намын удирдах албан тушаал хашиж байгаагүй тухай Б.Амартүвшин нь улс төрийн болон намын удирдах албан тушаал хашиж байгаагүй. Нэр дэвшигчийн нийгмийн даатгалын шимтгэл төлөлтийн талаарх тодорхойлолт болон хавсралтаар ирүүлсэн бусад мэдээлэлээр нотлогдсон.
18	Эрүүгийн хариуцлага хүлээж байгаагүй тухай Б.Амартүвшин нь эрүүгийн хариуцлага хүлээж байгаагүй нь иргэний эрүүгийн хариуцлага хүлээж байсан эсэх болон байгаа эсэх талаарх лавлагаа, тодорхойлолтоор нотлогдож байна.
19	Монгол Улсын иргэн мөн тухай Б.Амартүвшин нь Монгол Улсын иргэн мөн. Нэр дэвшигчийн иргэний үнэмлэхний лавлагаанд үндэслэв.
20	Шүүхийн ерөнхий зөвлөлийн шүүгч бус гишүүнд санал болгох үндэслэлүүдийг нэгтгэн дүгнэх нь Нэр дэвшигч Б.Амартүвшин нь ШтХ-ийн 76 дугаар зүйлийн 76.3-т заасан ШЕЗ-ийн шүүгч бус гишүүнд тавигдах шаардлага болох хууль зүйн өндөр мэргэжилтэй, эрх зүйч мэргэжлээр 10-аас доошгүй жил ажилласан, төрийн алба хаах насны дээд хязгаарт хүрээгүй, сүүлийн таван жил шүүгч, улс төрийн албан тушаал болон улс төрийн намын удирдах албан тушаал эрхэлж байгаагүй, эрүүгийн хариуцлага хүлээж байгаагүй Монгол Улсын иргэн байх шаардлагыг бүрэн хангаж байх тул нэр дэвшигч Б.Амартүвшин нь холбогдох хууль, журамд заасан Шүүхийн ерөнхий зөвлөлийн шүүгч бус гишүүнд тавигдах шаардлагыг хангаж байна гэж ажлын хэсэг үзсэн болно.

**Шүүхийн ерөнхий зөвлөлийн шүүгч бус гишүүнийг сонгон
шалгаруулах үүрэг бүхий ажлын хэсэг**